

## Ny Valosoa sy hadihady

### Tsy fialofan'ny malemy ny Fitsarana Malagasy

« Ity Lapa ity dia ho fikarohana ny fahamarinana sy ho fialofan'ny malemy ary ho andrimpirenena ». Io no soratra hita avy hatrany raha vao miditra ny Lapan'ny Fitsarana, tsy miala mihitsy io soratra io mandavantaona, ankoatr'izany dia tazana koa ny sary famantarana ny fitsarana dia sarin'ny lelami-zana roa mifandanja tsy mitanila, misy dikany lehibe koa io sary io.

#### NY "HCC" SY NY "CENI"

Ireny niaraha-nahita ireny ny fomba fiasan'io fitsarana avo io tamin'ny fifidianana filohampirenena tamin'ny 2018, fa dia fitsarana mitafy henatra, miaro anjambany ny mpangala-bato, hany ka lasa fiteny zavivazy ilay namberan'Ingahy Rakotoarisoa Jean Eric manao hoe "azar raisina fa tsy mitombina", marihina fa nahavita fianianana ara-dalàna ny "Hcc" teo aloha, fa ny "Hcc" ankehitriny koa vao mainka loza, satria dia olon'ny fitondrana roanjato isanjato, tsy misy azo antenaina amin'izay fahadiovan'ny fifidianana, fa dia efa fomba fanao ilay fianianana, ireo mpikambana ao amin'ny "Ceni" vaovao rahateo koa dia olon'ny fitondrana arivo isanjato, satria ny vadin-dRamatoa Minisitra no filoha vaovaoan'ny "Ceni", iny eo ihany fa ny tena mampisitra-belona dia io filoha io ilay mpikambana notendren'Ingahy Filohan'ny Repoblika, mazava izany fa dia miady ny tadin-dokanga ho an'ny roa tonta, fa dia mbola ho loza noho ny teo aloha ny hoso-pifidianana.

#### NY BIANCO SY NY PAC

Najoro ireo rafitra ireo iadiana amin'ny kolikoly amin'ny endriny rehetra, hatramin'izao anefa dia malaza tsy ihananana toa vilian-tsahona ireto izy, satria toa minia mangina tsy miteny manoloana ny karazankolikoly izay tsy takona afenina fa mibaribary sahala amin'ny tafika andrefan-tanàna, ny raharaha "bons'ons sucettes" sy "écrans plats", ny mikasika ireo fiara be dia be novidina nentina niady tamin'ny aretina koronavirusy tamin'ny taona 2020, tsy hita nanjavonana tamin'ny 2021, kanefa dia odian'ireto rafitra ireto fanina fotsiny ireo voalaza ireo, satria olon'ny fitondrana no voasaringotra, nesorina tamin'ny toerany fotsiny ireo minisitra tompon'ny ketraka dia samy vita ny raharaha, tsy nisy tohiny, tsy namerimbola toy ireo mpampanofa fahafinaretana.

Fa ny raharahampitsarana mbola vao mafana ny fitsarana an'i Dr Ramasomanana Ravo Nambinina, izay vao tamin'ny Alatsinainy 06 Desambra 2021 teo no nivoaka ny didimpitsarana, nohafahana noho ny fisalasalana ity dokotera ity, kanefa dia mbola takiana onitra 1 tapitrisa ariary indray.

Raha tsiahivina dia ny Dr Ramasomanana Ravo Nambinina, no sahy nanambara ampahibemaso ny fisian'ny kolikoly tao amin'ny Minisiteran'ny fahasala-

mana, tsy norahirahian'ny "Bianco" sy ny "Pac" ny fisian'ny kolikoly tao amin'ny minisiteran'ny fahasalamana, fa ny fitsarana an'ilay dokotera sahy nijoro indray no nataon'ny fitsarana dia navadika ny resaka, ka nolazaina fa manalabaraka ny fitondrana hono ny Dr Ramasomanana Ravo Nambinina, dia iny izy notsaraina iny, kanefa ilay fitondrana efa hatramin'ny nijoroany no efa afa-baraka foana.

#### RAHARAHA APOLLO 21

Ny azo antoka aloha dia tsy ho eken'ny fitsarana malagasy ny fangatahan'ny Me Razafinjato Willy, izay nitaky ny tokony handefasana mivantana amin'ny Rnm sy Tvm ny fizotran'ny fitsarana ny raharaha "Apollo 21", ny nanaitra tamin'ity raharaha ity dia ny nampidirana teny Antanimora an'ilay mpanakanto Sareraka iray andro mialoha ny fotoampitsarana, kanefa hatramin'izay navela nilamina tany amin'izay nisy azy, tsy izay ihany fa 13 ny isan'ireo olona naindrana teny Antanimora, ka asa na fifanandrifian-javatra na niniana natao hanamasinana ilay tarehimarika. Ny azo antoka dia tsy ho vita ao anatin'ny andro vitivitsy ny fitsarana, noho izany dia hody isan-kariva any Antanimora izy 13 mandra-pivoakan'ny didimpitsarana. Ho hita eo na hisy didy raikitra hivoaka avy hatrany na hahemotra aorian'ny fialantsasatry ny fitsarana ny famoahana didy, izay midika hoe manao Krismasy sy taombaovao any am-ponja izany ireto voarohirohy.

#### DIA INONA IZANY NY FITSARANA MALAGASY ?

Arak'ilay soratra hita eny amin'ny Lapan'ny fitsarana sy ny sarin'ny mizana tsy mitanila tazana eny koa, dia ny fitsarana tokoa no tokony ho lapan'ny fahamarinana, saingy indriny fa amin'izao fitondrana Rajoelina izao dia lasa rafitra mpiaro ny mpanao ratsy sy mpampanjaky ny firenena sisa ilay fitsarana, ary ireo biraompanjakana iasan'ireo tompon'andraikitra dia lasa zohy fieren'ny jiolahy.

Tokony hianiana amin'ny baiboly toy ny nataon'ny Filoha Ravalomanana fony izy nandray fahefana ireo rehetra izay miasa amin'ny fitsarana, satria efa tsy nahitana vokatra ny endrimpianana toy ny nataon'ny "Hcc", ny "Ceni", ny "Bianco", ny "Pac", sns... satria izy rehetra ireo dia toa Ingahy Filoha ankehitriny no nanaovan'izy ireo fianianana, satria dia arovany fatratra ilay Filoha sy ireo olony na dia hita izao aza fa meloka, ary ireo tsy mitovy hevitra amin'Ingahy Filoha tsy atao mahita ny rariny fa avilvily araka ny tokony ho izy ny zotram-pitsarana.

Noho ireo zava-nitranga ireo dia tokony hovaina na hesorina ilay soratra eny amin'ny Lapan'ny fitsarana, toy izany koa ilay sarin'ny mizana satria mandatsa ny vahoaka malagasy.

Ny Valosoa

Raharaha Apollo 21

### Nampidirina tany am-ponja i Sareraka

Niakatra fitsarana omaly, tetsy amin'ny Lapan'ny Fitsarana Anosy ilay raharaha Apollo 21, raharaha voalaza fa nisian'ny fikasana hamono ny filoha Andry Rajoelina. Olona miisa 20 mahery no voakasika amin'izao raharaha izao, ka tokony hohenoina mandritra izany fotoam-pitsarana izany, tokony hohenoina koa ireo vavolombelona, ny mpiampanga, ny mpisolovava, ... Fa mialoha ny nanombohan'io fitsarana omaly io, nampidirina teny Antanimora ny voampanga miisa 13 sy ny mpanakanto Sareraka.



Ny tetsy amin'ny Fitsarana Anosy omaly.

ary anisan'ny nanana ny toerany nandritra ny fannonanam-panjakana tamin'ny taona 2009. Fa raha tsiahivina ny alahady

teo, manamboninahitra miisa 13 no naiditra am-ponja, niaraka tamin'ny mpanakanto Sareraka, taorian'ny fanatanteraka

hana ny pitsompitsony araka ny lalàna, nahafahana naka azy ireo. Tsy nisy nanohitra izany ireo manamboninahitra jeneraly voakasika, rehefa nomena ny tompondraiketry ny fandraharahana ny fonja ny taratasy momba azy ireo. Anisan'ireo naterina teny amin'ny fonjan'Antanimora koa i Sareraka araka ny efa voalaza teo. Tao amin'ny fitsarana Anosy efitrano faha-4 no nataon'ny fitsarana. Olona 20 mianadahy: vehivavy 2 sy lehilahy 18, no nijoro nanoloana ny mpitsara sy ny mpitsara mpanampy 6 mianadahy. Nisintona fotoana fohy ny fitsarana taorian'ny fiantsoana anarana ary nitohy avy eo.

Ny Valosoa

### TROSAN'NY JIRAMA VOALOA

## Miandry ireo tompon'andraikitra nanodinkodimbola ny maro

Araka ny nambaran'ny minisitry ny vola Rindra Hasimbelo Rabarininarison ny herinandro teo, voalao ny 2 desambra lasa teo ilay trosan'ny Banky iraisam-pirenena tamin'ny orinasa JIRAMA, avy amin'ilay tetikasa Pagose. Ny nahagaga ny mpanara-baovao tamin'ity raharaha ity, nahoana no nitaky maika ny volany ny Banky iraisam-pirenena tamin'ity indray mitoraka ity, mbola tsy nisy an'izany hatramin'izay. Ny fifanarahana amin'ny Banky iraisam-pirenena amin'ny ankapobeny dia mandritra ny 20 na 30 taona no mandoa ny trosany, ary amin'ny tahan-janabola ambany izany. Matoa nitranga ny toy izao, tamin'izao fitondrana Rajoelina izao dia tena mampiseho ny tsy fahaiza-mitantana sy ny halatra ataon'izao fitondrana izao. Voalao ny trosa, fa afaka mba mahazo tatitra ve ny vahoaka ny amin'ny vola nandoavana azy hoe avy taiza? Afaka mahafantatra ve ny vahoaka hoe, nankaiza izany ilay vola nanjavona tao? Tsy tokony hisy ve ny fanadihadiana hatao hahafantarana marina izay zava-nisy tao, satria na misy vola naloa, na misy vola tokony ho nampiasaina, dia volam-bahoaka foana no resaka eto, ka rariny ny vahoaka raha mahalala izay alehan'ny hetra aloany, rariny ny vahoaka raha tsy tompon-trano mihono, fa raha sanatria tsy hisy izany rehetra izany, dia mpanontany tena foana hoe misy mpitondra ve eto ?

Niaina



Ny foiben-toeran'ny orinasa Jirama etsy Ambohitovolo Ambohy.

### TONONKALO

## O ry jiolahy mpandainga !

Ireo milaza ny tsy mety, mampipongatra ny marina, Ireny indray ankehitriny no "ampangaina" sy "amboarina"? Ary mbola hosoram-potaka, ampandoavina lamandy, Na tebahina mihitsy fa hoe olona mavandy ?

Raha izay no sary hita dia tsy ampiana, tsy analana, Fa jiolahy no mialokaloka ao anaty fitondrana, Ka ireo olona mitaky ny mangarahara hatrany, No adoboka any am-ponja sy hazaina sesisany !

Aza gaga koa isika raha fiadiana no hafarana, Fa ho an'ny jiolahy dia izay no tena lohalaharana, Handripahany ny hafa izay manelingelina azy, Sy hiarovany ny namany, tsy higadra, tsy ho voasazy.

Ireo "be kibo" efa mivondraka, mampiaiky ny vahoaka, No vao mainka toa mibontsina sy efa mila ny hipoaka, Fa iretsy fisa-kibo sy efa kely ny eny an-tanany, Toa vao mainka esorina aminy ny rehetra mba ananany!

...Dia mba inona ary izany no entinao hiarovan-tena, Manoloana ireo "mpamatsy" sy "ny iraisam-pirenena", Ny amin'iretsy volabe izay toa nanjavona tanteraka ? (Tsy nisitraka an'izany anie ny ory sy ny reraka !)

Sa dia fafy lainga hatrany no hany sisa ianteherana, Mba ho fanadiovan-tena sy ho fiarovana-toerana ? O ry olona tsy marina nefa hita ho mihangetroka, Izato lainganao, tsarovy fa tsy maintsy ho vaky betroka !

...Donga takona ny lainga hoy ny manam-pahendrena, Fa mahia raha mifanatrika ka meteza hitsara tena. Sady mbola averina eto mba ho fehin'ny androany Fa "ny marina irery no hany handova itony tany"!

DADAN' i RIANA (01-12-21)